

Aningaasarsianit akileraarutit pillugit Inatsisartut inatsisaata nr. 12, 2. november 2006-imeersup allanngortinneqarneranik Inatsisartut inatsisaat (Aktiaatillit taarsigassarsiaasa akileraaruserneqartalernissaat, atornerluisoqarsinnaanera akiorniarlugu maleruagassaq, sulisorisanik atukkiussinermi akileraarutinik unerartitsisussaatitaaneq il.il.)

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaitigut Inatsisartut inatsisaatigut nr. 3, 30. november 2009-meersukkut, Inatsisartut inatsisaatigut nr. 20, 18. november 2010-meersukkut, Inatsisartut inatsisaatigut nr. 37, 9. december 2015-imeersukkut, Inatsisartut inatsisaatigut nr. 7, 6. juni 2016-imeersukkut allanngortinneqartumi, kingullermillu Inatsisartut inatsisaatigut nr. 29, 28. november 2016-imeersukkut allanngortinneqartumi makku allannguutigitinneqarput:

1. § 1, imm. 1, nr. 3, ima oqaasertaqarpoq:

"3) aktiaateqarluni aamma piginneqataassuseqarluni ingerlatseqatigiiffit Kalaallit Nunaanniittutut nalunaarsorneqarsimasut, imaluunniit Kalaallit Nunaanni aqutsisoqartut,"

2. § 1, imm. 3-p kingornagut imm. 4-tut ilanngunneqarpoq:

"Imm. 4. Tamakkiisumik akileraartussaatitaapput danskisut innuttaassuseqartut, § 1, imm. 1, nr. 1-imi 2-milu pineqartunut ilaanggikkaluarlutik Namminersorlutik Oqartussanit, kommuninit pisortalluunniit suliffeqarfiutaannit il.il. allanit, naalagaaffiu avataanut suliartortinneqartut, aammalu nunat tamat isumaqatigiissutaat naapertorlugu nunami najorallakkaminni akileraartussaatitaanngitsut. Oqaaseqatigiiit siulliit malillugit akileraartussaatitaasunut ilaapput aappaasut inunnut taakkununnga inooqataasut aamma meeqqat taakkunani najugaqartut, ukiup aningaasarsiorfiusup aallartinnerani suli 18-iliisimanngitsut, aappaasut meeqqallu taakku danskisut innuttaassuseqarpata aammalu aningaasarsianit akileraarutinik, nunami takornartami maleruagassat inunnut tassani najugaqartunut atuuttut naapertorlugit akiliisussaatitaanngippata."

3. § 2, imm. 1, nr. 15, ima oqaasertaqarpoq:

"15) pigisamik aalaakkaasumik Kalaallit Nunaanni pigisaqartut tassanngaluunniit isertitaqartut, matumani aamma tunisaqarnikkut, imaluunniit"

4. § 3, imm. 1, nr. 8-p kingornagut nr. 9-tut ilanngunneqarpoq:

"9) Inuit Atomip nukinganik pissuteqartumik ajutoortoqartillugu imaluunniit qinngorernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqtigiissut naapertorlugu ikiuuttut, aatsaalli inuit pineqartut inatsimmi § 1, imm. 1, nr. 1-2-mi pineqartunut ilaanngippata."

5. § 16-ip kingornagut ilanngunneqarpoq:

"§ 16 a. Ingerlatseqatigiiffik il.il. § 1, imm. 1, nr. 3-mi 4-miluunniit pineqartunut ilaasoq, kiisalu ingerlatseqatigiiffik il.il. taamaaqataa nunani allani angerlarsimaffeqartoq aningaasanik inummut, toqqaannartumik toqqaannanngitsumilluunniit atugassaqartitsippat, taarsigassarsisitsippat qularnaveeqquisiippalluunniit, taarsigassarsiat aningaasarsianit akileraarutit pillugit inatsimmi maleruagassat nalinginnaasut naapertorlugin tigusatut taarsigassaangitsutut isigineqassapput, aatsaalli taarsigassarsisitsisoq taarsigassarsisorlu § 86, imm. 3-mi pineqartutut imminnut attuumassuteqarpata. Oqaaseqatigiit siilliit taarsigassarsianut il.il. nalinginnaasumik niuernermut atatillugu taarsigassarsiaritinneqartunut il.il., imaluunniit aningaaserivinnit taarsigassarsisitsarfinnillu taarsigassarsianut nalinginnaasunut atuutinngillat. Oqaaseqatigiit siilliit aamma atuutinngillat Aktiaateqarluni ingerlatseqatigiiffit pillugit inatsisip Kalaallit Nunaannut atuutilersinnejcarnera pillugu peqqusummi § 115 a naapertorlugu aamma Piginneqataassuseqarluni ingerlatseqatigiiffit pillugit inatsisip Kalaallit Nunaannut atuutilersinnejcarnera pillugu peqqusummi § 50 naapertorlugu taarsigassarsianut.

Imm. 2. Taarsigassarsiat imm. 1 naapertorlugu akileraaruserneqartut taarserneqarpata, aningaasat taarserneqartut ingerlatseqatigiiffiup aningaasarsiaasa akileraaruteqaataasussat naatsorsorneranni ilanngunneqassanngillat.

6. § 36 a, imm. 1-2, ima oqaasertalerneqassaaq:

"§ 36 a. Aningaasarsianit akileraaruteqaataasussanit naatsorsuinermi, akileraartussaatitaasut 1) inunnit inatsisitigulluunniit pisussaatitaasunit aalajangiisuusumik aqunneqartuusut imaluunniit 2) inatsisitigut pisussaatitaasunut aqutsisuusut imaluunniit 3) inatsisitigut pisussaatitaasumik suliffeqarfissuarmut attaveqartut, imaluunniit 4) nunani allani aalajangersimasumik ingerlatsiviutilik, imaluunniit 5) inuk inatsisitigulluunniit pisussaatitaasoq nunami allamioq Kalaallit Nunaanni aalajangersimasumik ingerlatsiveqartoq il.il, takuuk § 2, imm. 1, nr. 10-miit 12-imut, matuma Inuit, inatsisitigut pisussaatitaasut aalajangersimasumik ingerlatsiviit ilaalu ilanngullugit Kalaallit Nunaanniittut Kalaallillu Nunaata avataaniittut qulaani taaneqartut niuernikkut imaluunniit aningaasatigut nuussivigeqatigneranni (nakkutigisaasumik aningaasanik nuussineq), illuatungeriit attuumassuteqanngitsut akornanni nuussinerugaluarpat angusarisinnaasimasat naapertorlugin akit piumasaqataasullu atorneqassasut. Nr.1-imti inatsisitigut pisussaatitaasut imm. 4-milu ingerlatseqatigiiffit peqatigiiffit assigisaasalu inissismaffi assigilersinnejcarput, Kalaallit Nunaanni akileraartarnermut inatsit naapertorlugu akileraartussaatitaasutut taasaanngippata kisiannili pissutsit ingerlatseqatigiiffit ingerlatsineranni maleruagassanut, ingerlatseqatigiiffit isumaqtigiissutaasigut imaluunniit peqatigiiffit maleruaqquaannit aalajangersarneqarpata.

Imm. 2. Nakkutiginninneq matumanii paasineqassaaq piginnittuuneq taasisinnaanermulluunniit pisinnaatitaanermik atuisinnaaneq, tamatumani toqqaannartumik toqqaannanngitsumilluunniit aktiatigut aningaasaatigisat 50 procentii sinnerlugit pigineqarpata imaluunniit 50 procentii sinnerlugit taasisinnaassuseqarnermi. Akileraartussaatitaasup inatsisitigut pisussaassuseqartumut nakkutilliisutut isigineqassaneranik, imaluunniit akileraartussaatitaasoq inummit inatsisitigut pisussaassuseqartumit

inummilluunniit nakkutigineqarnersoq naliliiffiginninnermi makku ilanngunneqassapput:

- 1) aktiat imaluunniit taasisinnaanermut pisinnaatitaanerit, suliffeqarfissuarmut atasuusunik ingerlatseqatigiiffinnit, imm. 4 naapertorlugu taasat, aamma
- 2) aktiat aamma taasisinnaanermut pisinnaatitaanerit, inunnit aktiaateqartuusunit qanigisaannillu pigineqartut,
- 3) aktiat imaluunniit taasisinnaanermut pisinnaatitaanerit, aningaasaateqarfimmit imaluunniit ingerlatseqatigiiffinnit kattusseqatigiiffimmit piginnittuusumit namminermiit pilersinneqartumit imaluunniit ingerlatseqatigiiffinnit suliffeqarfissuarmut atasuusunit taaneqartunit, qanigisanit il.il. imaluunniit aningaasaateqarfinnit taakkuninnga pilersinneqartunit pigineqartut ilanngullugit naatsorsuutigineqassapput,
- 4) piginneqataassutsit taasisinnaanermullu pisinnaatitaanerit, ingerlatseqatigiiffimmi peqataasunit allanit, ingerlatseqatigiiffimmi peqataasup atuinissamik nakkutilliinissamillu isumaqatigiissuteqarfigisimasaanit, pigineqartut naatsorsuutigineqassapput, aamma
- 5) piginneqataassutsit aamma taasisinnaanermut pisinnaatitaanerit, inummit § 1-imi ilaasumut pigineqartut, qanigisat imaluunniit aningaasaateqarfifit taakkuninnga pilersinneqarsimasut peqatigalugit.”

7. § 46, imm. 6-ip kingornagut imm. 7-itut ilanngunneqarpoq:

”Imm. 7. Imm. 1 aamma 2 atutissanngillat soraernerussutisiaqarnissamut inuunermulluuniit sillimmasiinermik aaqqissuussinermut imaluunniit soraernerussutisiaqarnissaq siunertaralugu ileqqaakkanut piffissami qaammatinit 23-nit sivisunerusumi akiluiteqartoqarsimanggippat, imaluunniit aaqqissuussineraup ileqqaakkalluunniit piffissami atorunnaarsitsiffiusumi nalinga 10.000 kr.-init minneruppat.”

8. § 63, imm. 2, ima oqaasertalerneqassaaq:

”Imm. 2. kommuninut ataatsimut akileraarummut procent akileraarutissaq Naalakkersuisunit, kommuninik tusarniaareernermi aalajangerneqassaaq qaammatisiutit malillugit ukioq akileraarutip atuutilerfissaa sioqqullugu ukiup affaani siullermi lnatsisartut ataatsimiinneranni.”

9. § 69-ip kingornagut ilanngunneqarpoq:

”**§ 69 a.** Akileraartussaatitaasut marloriaammik akileraarnissaq pinngitsoorniarlugu isumaqatigiisummik iluaquteqassanngillat, pissutsit pisullu soqutiginaatillit tamaasa eqqarsaatigalugit aalajangerneqarsinnaasorinarpat iluaqutiginninniarneq, aaqqissuussinerni suniluunniit imaluunniit nuussinerni suniluunniit toqqaannartumik toqqaannanngitsumilluunniit iluaqutiginninnermik kinguneqartoq siunertat pingarnerit ilagigaat, aatsaalli pisut taakku apeqqutaatillugit iluaqutiginninnissamik akuerineqarnissap, isumaqatigiisummi aalajangersakkap pineqartup imarisaanut siunertaanullu naapertuuttuunera upternarsarneqanngippat.”

10. § 75, imm. 1, nr. 2-p kingornagut nr. 3-tut ilanngunneqarpoq:

”3) § 46, imm. 7 naapertorlugu tunniunneqartut.”

11. § 75, imm. 3, nr. 2-mi allassimasoq ”76, imm. 4” allanngortinneqarpoq ima ”76, imm. 5”

12. § 76, imm. 3-p kingornagut imm. 4-tut nutaatut ilanngunneqarpoq:

”Imm. 4. Inummut, suliffeqarfimmit nunami maani angerlarsimaffeqanngitsumit nunami maani sulisussatut atukkiunneqarsimasumut akissarsianik tunniussinermi unerartsitisusaaftitaaneq suliamik sullinneqartup isumagisassaraa. Tamannali taamaallaat atuuppoq suliaq suliffeqarfiup nunami maani ingerlataata ilagippagu. Suliffeqarfik nunami maani angerlarsimaffeqanngitsoq inuup aningaasarsiai A-t, paasissutissallu allat pineqartup akileraarutaasa A-t nalunaarutigineqarnissaannut,

unerartinneqarnissaannut akilerneqarnissaannullu pingaarutilit pillugit uppernarsaatnik tunniussaqanngippat, suliamik sullinnejartup akileraarutit A-t akiligassanit tamarmiusunit naatsorsussavai. Oqaaseqatigiit siullit atuutissanngillat suliffeqarfik nunami, Namminersorlutik Oqartussat akileraarutinik unerartitsisarneq pillugu ikioqatigiinnissamik isumaqatigiissuteqarfisaani angerlarsimaffeqarpat, tak. § 114, imm. 2, nr. 3."

Imm. 4-6 matuma kingorna tassaalerput imm. 5-7.

§ 2

Imm. 1. Inatsit 1. juli 2017-imi atortuulissaaq.

Imm. 2. § 1, nr. 1, nr. 3, 4 aamma 9 ukioq aningaasarsiorfusoq 2017 aallarnerfigalugu aningaasarsiat akileraaruteqataasussat naatsorsorneranni atuutissapput.

Imm. 3. § 1, nr. 5 taarsigassarsianut 1. februar 2017 aallarnerfigalugu taarsigassarsiaritinneqartunut atuutissaqq.

Imm. 4. § 1, nr. 12, 1. januar 2018 aallarnerfigalugu atuutissaqq.

Namminersorlutik Oqartussat, ulloq 26. juni 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut